

Çhellegram

Çhyndaays jeh skeeal scruit 'sy Vaarle ec John Pilling

Feiy'n shiaghtin ayns ny pabyryn naight v'ad çheet er cah mooar fo raad 'sy Rank, faggys da boayl enmyssit Amiens. T'ad gra dy vel wappinyn noa ain enmyssit tankyn, foddee brishey trooid ny linnaghyn Germaanagh. T'ad gra dy row ny Germaanee currit fo haart, dy vel ad roie er-çhea.

Jea v'ad gra nagh voddagh ad cummal seose nyn eabyn rish foddey as dy row y caggey bunnys er jeet gy kione.

Va Mummig as Shaner jeeaghyn ny s'maynrey na v'ad rish foddey. Ren Mummig clamey mee dy çhionn as dooyrt ee, "Foddee dy jig dy yishag dy valley dy Leah." V'ee mongey.

"Cha by chiart dasyn goll," ren Shaner gaccan. "Va feme ain ersyn ayns shoh. Ooilley yn stoo shen mychione caggey son y çheer echey. Cre'n fys va echey er caggey? Ommidjys ta mee gra rish. Cre mychione bee son y çheer? Shen kiart cho scanshoil, nagh vel?"

"Ny gow toshiaght er shen reesht, Yishag," as Mummig. "Va Joe gennaghtyn dy row feme ersyn goll, as shen eh. Ta fys aym dy vel eh doillee dooin n'egooish, agh t'eh çheet lhien, lesh cooney dy liooar veih'n dooinney aeg shoh."

Ren ee mongey as hug ee clame dou reesht.

"Lesh cooney Yee, hig eh back dy Leah."

"Ta mish cur yn foill er ny mraane agglagh chreoi-wannalagh shen," as Shaner, "goll mygeayrt cur magh fedjagyn baney. Cha vaik shin adsyn marçhal rhyomboo boayl ennagh. Lhisagh eh ve er hannaghtyn sthie as er chooney dy lhasaghey y gowaltys."

* * * *

Hoal 'sy Rank, cruetchal sheese ayns trensh fliugh breinn choud's v'eh fuirraghtyn er cowrey dy chur orroo goll er-oaie, va'n mac echey, Joe Coatsworth, jeh'n un aigney, rere y vriwnys jeant echey foddey er dy henney. Yn graih çheerey va cur ersyn hoshiaght dy ve ny hidoor, va shen foast cur creeaght da. Agh dy Leah v'eh er ngeddyn magh nagh row ooashley as gloyr y chah, orroo va moylley cho shicky currit liorish sleih nagh ren rieu goaill aym 'sy lheid, freggyrtagh da rieughid y chaggey jeshaghtagh v'ayn. Tannaghtyn bio, cha row shen agh aigh vie ort.

Doaltattym haink kione er yn taarnagh dy vleaystanyn potal as buirrooghey. Rish tammylt va feiyr myr frass goll er jannoo choud's va'n ooir tuittym sheese reesht gys e voayl dooghyssagh. Eisht va tostid ayn. Nane... jees... three... kiare... queig shallidyn. Yeeagh offishear unnid Joe jeeaghyn er yn ooreyder echey, as hug eh feddan da ny meillyn echey, as haink bine bing magh ass. Va feddan lurg feddan ry chlashtyn, rish y clane trensh.

"Kiart dy liooar, ghuillyn," deam yn offishear. "Eiy shiu orrym."

Ren ooilley ny deiney goaill toshiaght er drappal seose ny aaraghyn. Reesht haink yn seihll dy ve ny vusthaa dy ard-'eiyryn agglagh: bingys ny feddanyn, eamyn ny deiney, lane dy aggle choud's v'ad shooyl er-oaie; ny screeaghyn jeusyn va gortit hannah; y donk-donk as cabbagh ny gunnyn jeshaght bwoalley magh nyn ryddim reesht. Ren Baase leaystey e yiarn foldeyragh as va raad lhean giarrit roish.

Three cheead stundayrt veih shoh, ren Gunther Klaus, ny arryltagh shiaght bleeaney jeig dy eash ayns sheshaght chaggee y Chaiser, strepey seose er greeish orraghey yn trensh echey. Hug eh seose gys e gheaylin yn raifyl echey as ren eh jeeraghey eh er y noid va cheet coair. Queig shallidyn ny s'anmey hooar eh baase çhelleeragh tra ren bullad smoashal trooid y vayrn chaggee echey as ren eh raipay veih cooyl e ching. Agh yn un eab jeant dy persoonagh echey myr aymn jeh'n chaggey shoh, v'eh er lhiggey un vullad. Ren y bullad faagail y raifyl echey ec mysh daa filley dy lieh y vieauid feiy. Cha nee agh corrillagh beg dy hallid va ceaut echey ayns etlagh harrish y varney eddyr ny trenshyn, roish my ren eh bwoalley noi corp Joe Coatsworth choud's v'eh geiyrt er yn offishear echey.

* * * *

Va mee gimman yn ollagh seose gys y vagher syrjey lurg blieaun y voghree tra honnick mee y guilley çhellegraf markiagh er y roar jiarg echey, sheese straid y ghowaltys gys y thie. Va fys aym er y vun jeh shen. Va fys ain ooilley. Va peiagh erbee caillt ec bunnys dy chooilley lught-thie 'sy valley beg çheerey.

Dy moal ren mee stiurey y vooa yerrinagh stiagh 'sy vagher. Ren mee dooney y ghiat as va mee lieh-lhie urree, as sorçh dy vagganeys cheet orrym. Veih'n voayl shoh oddin fakyn y clane gowaltys skeaylt magh foyrn, as va mee jeeaghyn er y ghuilley çhellegraf choud's v'eh markiagh back seose y traid reesht. Cha row my voir ry akin, agh choud's va mee freayll arrey, honnick mee y dorrys fosley as haink Shaner magh ass y thie. Hooill eh dy moarl harrish gys y waag veg 'sy gharey. S'mie lesh va ve ny hoie 'syn 'astyr beg as goaill bine dy rum v'eh cummal ayns shen.

Keayrt dy row, tra va mee foddey ny saa, ren mee geid paart jeh as diu mee eh. Va mee çhing agglagh. Va Shaner shirrey er Jishag dy cherraghey mee, agh cha ren eh agh garaghtee as dooyrt eh dy row pennys dy liooar aym hannah lesh ve cho çhing. Va Jishag rieu myr shen. Cha ren eh mish y cherraghey, cre erbee va jeant aym. Dooyrt eh dy row bea hene gynsaghey lessoonyn er-lheh dy liooar dooin. Eisht yinnagh eh garaghtee as mish y chlamey dy çhionn. Va graih moor aym er my Yishag.

As mish lieh-lhie er y ghiat, dennee mee ny jeiryn goaill toshiaght er roie dy moal sheese my eddin choud's va mee cheet dy hoiggal cho scanshoil dou as va shen va caillt aym. As eisht smooinee mee er Mummig as Shaner, va cho maynrey as cho lane dy hreisht riy, as shicky dy beagh Jishag cheet dy valley dy Leah. Cre'n agh oddagh adsyn cur rish?

Dy moal ghow mee toshiaght er shooyl sheese y vagher gys y ghiat erskyn yn uhllin, as mish skeabey ersooyl ny jeiryn aym as çhirmaghey my hooillyn lesh my vhuinneel. Foddee laa ny vairagh yinnin dobberan son my Yishag 'sy tra aypene as 'syn agh aypene, agh jiu cha jinnagh shen cooney lesh Mummig as Shaner monney, mish dy ve brisht dy bollagh.

Hie mee harrish y chlose as stiagh ayns thie moor y ghowaltys. V'eh follym, agh tra raink mee bun ny greeishyn oddin clashtyn dy row Mummig keayney 'sy çhamyr eck. Cha row

Shaner ry akin boayl erbee. Va'n çhellegram er y voayrd 'sy thie mooar. Va peiagh ennagh er chur eh back dy kairailagh 'sy choodagh. Hayrn mee ennal dy dowin, ren mee fosley magh eh as ren mee lhaih:

"GORTIT CHA NEE TROME REESHT CHA NEE TROME STAP. FO RAAD THIE STAP. GRAIH JOE."